

Mulegns, Sur e Marmorera

Vischnancas situadas sin il stgalim superiur dal Surses

■ Sin il stgalim superiur, vul dir sur il gaud da Tinizong (Surgôt) sa chattan las vischnancas da Rona, Mulegns e Beiva, construidas lung la via, la vischnanca aglomerada da Sour sin la spunda ost da la val e quella da Murmarera reconstruida il 1954 sur il lai da serra cun il medem num. Oz fa il LIR staziun en las trais vischnancas da Mulegns, Sur e Marmorera, situadas en vischinanza dal Lai da Marmorera.

Mulegns

Vischnanca politica, circol Surses, district Alvra, situada a la via dal Güglia a la buccada da la Val Faller, tudestg Mühlen (fin il 1943 denominaziun uffiziala). 1850 120 abitants; 1900 146; 1950 109; 1960 57; 2000 33. En ils onns 600–500 a.C. han ins explotà arom en la Val Faller ed èn stadas activas ina fundaria ed ina miniera da minerals metallics. Il vitg, menziunà il 1521, è vegnì amplifitgà en il 15avel tschientaner da Gualsers derivants da la Val Faller. Il 1315 è attestada per l'emprima giada l'alp Faller sco feud episcopal. La baselgia da S. Gaudenz dal temp medieval tardiv (consecrada oz als ss. Gaudenz e Francestg) è vegnida rempazzada il 1643 dals chaputschins tras la baselgia barocca da S. Francestg. La plaiv cuminaivla da Mulegns e Sour è vegnida pastorada fin al temp preschent da chaputschins. En la chaplutta da Faller (Visitaziun da Maria) sa chatta ina tavla d'altar remartgablà dal 1760. En il 19avel tschientaner vegnivan stgamiads ils chavals da posta a Mulegns (stallas per ca. 150 chavals). L'hotel Löwe vegniva frequentà da personalitads impurtantas. L'avertura da la Viafier da l'Alvra (1903) ha inizià l'emigraziun. A l'entschatta dal 21avel tschientaner devi mo pli paucs purs a Mulegns. Las alps da la Val Faller, betg pli abitada dapi il 18avel tschientaner, vegnan affittadas ed ils prads da culm cultivads. Consorzi da scola cun Sour e Murmarera dapi il 1975, dapi il 1963 frequentan ils uffants la scola secundara a Suagnign. Dapi il 1994 han Mulegns e Sour in unic uffizi postal. Part da la populaziun da lingua rumantscha: 1980 92 % (lingua materna); 1990 73 % / 86,5 %; 2000 57,6 % / 66,7 % (megra lingua/tuttas indicaziuns).

Gion Peder Thöni

Val Faller

Val laterala en la vischnanca da Mulegns, situada al sidvest da Mulegns. Il 1315 è attestada ina *alpe dicta Valler* en possess (sco pegn) da Johann von Rietberg, ministerial da l'uestg. Suenten il 1343 è la val vegnida urbanisada. Il 1379 existivan a Tgà ed a Plang (a ca. 1930 m) la curt ed ils bains d'almain quatter familias. A Tgà sa chatta la chaplutta consecrada a la Visitaziun da Maria, menziunada il 1643. Ils emprims abitants permanentes derivan probablamain da Stampa. A la Val Faller han appartegnì en il temp medieval tardiv – sper las alps a Tgà ed a Plang – era ils aclauns da Plaz (1763 m) en la part d'amez e da Sblocs (ca. 1700

m) a l'entrada sanestra da la val. Quests aclauns furmavan a ses temp probablamain il vischinadi da Faller, menziunà il 1390. Durant il temp medieval è la val stada colliada cun la Val d'Avras tras ina via sur la Val Gronda e la Val Starlera d'ina vart ed ina via da stad tras la Val Bercla da l'autra vart. Ils gauds da sember dal temp medieval (fin ad in'atezza da 2200/2300 m) èn svanids, las culegnas èn sa transfurmadas en aclas.

Adolf Collenberg

Splitsch

Ruina d'ina tur d'abitat medievale situada sin in pitschen spelm en la vischnanca politica da Sour. La tur aveva trais plauns cun in'entrada auta al segund plaun. Al plaunterren sa chattava in chamin cun consolas da lain per il chapitsch ed in fimagl inclinà. Al segund plaun existivan locals d'abitat, fanestras cun bancs ed in balcun tort cun latrina, plinavant ina pigna da maiolica cun fimagl. Al sid da la tur existan relicts d'in mir da tschinta che circumdava ina curt da provediment, construida da mirs sitgs e da lain. La tur, erigida dals de Marmels, datescha probablamain da l'entschatta dal 13avel tschientaner. Il 1486 era la tur en possess dals Beccarias. A la fin dal 15avel tschientaner è la curt vegnida cedida sco feud eredità cun l'obligaziun da mantegnair il tetg da la tur. La dumonda, schebain l'implant era da quel temp anc abità, na po betg vegnir respundida senza perscrutaziuns archeologicas.

Maria-Letizia Boscardin

Sur (Sour)

Vischnanca politica, circol Surses, district Alvra, situada en la part sura dal Surses (Surgôt), cun ils aclauns da Furnatsch e Tgacrest e quatter aclas respectivamain culegnas d'alp a Flecs. 1850 163 abitants; 1900 178; 1950 227 (inclus ils lavurers engaschads en la construcziun dal mir da serra da Murmarera per las Ovras electricas Turitg); 2000 93. A l'entschatta dal 13avel tschientaner han ils signurs de Marmels laschà construir il chastè da Splitsch (oz en ruina). Fin il 1850 ha Sour appartegnì a la dretgira auta dal Surses entaifer la Lia da la Chadé. Il 1663 han ils chaputschins erigì sin ils fundaments da la baselgia medievale da S. Baltramieu la baselgia barocca da S. Catregna. Oz furma Sour, ensem cun Mulegns e Murmarera, ina plaiv comunabla. Avant il 1950 era Sour in vitg puril. Dal temp medieval fin suenter il 1900 (avertura da la Viafier retica en l'Engiadina il 1903) ha il traffic da transit sur ils pass garantì in gudogn supplementar als purs (vituraria, transports da martganzia). Da l'economia forestala pudeva Sour strusch profiter, essend che la vischnanca sa chatta al cunfin dal gaud. Oz offera il turissem, naschì en las regiuns da skis da Suagnign e Beiva, novas pussaivladads da gudogn. Dapi il 1845 ha Sour ina scola e fa part dal consorzi da scola dal circol da Surses. L'administraziun comunabla da Sour, Mulegns e Murmarera sa chatta actualmain



Ils nums locals si Flix cumprovan ch'ils Gualsers avevan colonisà en il 14avel tschientaner sulettamain il stgalim mesaun da la planira auta.

FOTO J. F. PAJAROLA

en la chasa communal da Sour. Ils Gualsers da lingua tudestga, immigrads suenter il 1200 a Flecs, èn vegnids rumantschads. Sour ha decidì la meglieraziun generala il 2002.

Gion Peder Thöni

Flix (Flecs)

Part da la vischnanca politica da Sour, cun in'alp e quatter aclas situadas a 1970 m sin ina terrassa lungenta orientada vers il vest, tudestg Flix. Oriundamain ina culegna da stad da Rumantschs. En il 14avel tschientaner èn sa domiciliads Gualsers d'Avras a Flecs; abitadi permanent a partir dal 15avel tschientaner. Ils nums locals cumprovan ch'ils Gualsers avevan colonisà sulettamain il stgalim mesaun da la planira auta. La «Tgadmeç», ina grappa da chasas sin 2000 m, è pregualsra. La chaplutta medievale dedigada als ss. Placi e Sigisbert, amplifitgada tras chaputschins enturn il 1660, è vegnida consecrada a s. Roc, il patrundals malsauns da la pestilenza. Survivents da la pestilenza dal 1629–30 èn sa domiciliads a Sour, nua ch'èls èn vegnids naturalisads il 1657. Da vegl ennà (gia preistoric?) fin en il 19avel tschientaner èn vegnids explotads minerals da fier en la regiun da la Gruba/Alp Flecs (elavurads a Cunter en Surmeir), tranter il 1828 ed il 1847 era en vischinanza da l'aclaun da Salategnas. Ils gauds da Flecs, che s'extendevan a ses temp fin a 2400 m, èn probablamain vegnids runcads per alimentar las minieras. Bliers edifizis agrics betg pli utilisads èn vegnids transfurmads en chasas da vacanzas. Dapi il 1980 exista in'ustaria a Flecs. La flora dal lieu è unica en ses gener.

Gion Peder Thöni

Marmorera (Murmara)

Vischnanca politica, circol Surses, district Alvra. Vitg lung la via dal Set e dal Güglia

fin il 1950, oz situà sin la spunda ost sur il Lai da Murmarera. Ca. 840 *ad Murmarera*, tudestg antruras era Marmels. 1850 156 abitants; 1900 143; 1920 100; 1941 94; 1950 140; 1960 28; 2000 49. En il temp medieval ha Murmarera fatg part da la signoria dals de Marmels, il chastè dals quals, construi sut in grip surpendent, è menziunà l'emprima giada il 1193. Ecclesiasticamain appartegna Murmarera anc adina a Beiva; tranter il 1631 ed il 1925 è il vitg vegnì pastorà da chaputschins. La nova baselgia è – sco la veglia – dedigada a s. Florin. Dal temp medieval fin viaden il 17avel tschientaner han ins explotà serpentinitis en ils conturns da Murmarera. Fin il 1950 vivevan en il vitg surtut purs da muntogna ch'avevan chattà dapi il temp medieval in'occupaziun supplementara en la vituraria ed en il traffic sur ils pass. Cun l'avertura da la viafier da l'Alvra (1903) ha cumenzà l'emigraziun. Il 1948 ha la radunanza communal da Murmarera accordà la concessiun a las Ovras electricas da la citad da Turitg per la construcziun d'in lai da fermada cun centrala a Tinizong. Cun in rempar da terra da 2,5 km lunghezza, l'emprim en Europa, han ins alura stagnà il Lai da Murmarera; dapi il 1954 è il vegl vitget sut aua. En il nov vitg da Murmarera (tudestg Neu-Marmorera) na vivan pli nagins purs, e las alps vegnan affittadas ad esters. Murmarera furma in consorzi da scola cun Mulegns e Sur. Il dialect rumantsch caracteristic è sin il precinct da svanir. Part da la populaziun da lingua rumantscha: 1941 95 %; 1980 41 % (lingua materna); 2000 34,7 % / 53 % (megra lingua/tuttas indicaziuns).

Gion Peder Thöni

De Marmels

Famiglia da chavaliers e ministerials cun residenza sin lur chastè-fortezza sper Murmarera. L'emprim member attestà è Andreas (1160), ministerial da l'uestg da Cuir, dal qual el possedeava en feud ina part dal chastè da Tarasp. Il 1193 ha el (u ses figl cun il medem num) rapinà en num da l'imperatur il legat cardinal Cintius sin la ruta dal Set ed emprashunà el sin ses chastè. Cun plirs members influents da la noblezza retica ha Nannus concludì il 1219 la pasch tranter l'uestg da Cuir e la citad da Com. Il 1293 cumpara Andreas sco terza perditga tranter ils *nobiles et barones* che conferman l'alleanza d'amicitia tranter l'uestg da Cuir ed il ducadi da Milaun.

Dal 14avel–16avel tschientaner èn stads activs numerus exponentes da la famiglia Marmels sco interprendiders, ministerials, politichers e spirituals. Els controllavan per gronda part il traffic da transit sin il Pass dal Set, possedeavan las mi-

nieras dal Surses e dapi il 1338 ils implants per l'extracziun da mineral da fier cun galarias e furns en la Val d'Err sper Tinizong. Els èn stads chastellans da l'uestg da Cuir en diversas valladas, oravant tut a Riom e Greifenstein e cumparan ultra da quai sco derschaders, uffiziers u mess. Johannes era canoni da Cuir il 1350. Dietegen presidiava ina dretgira da cumpromiss episcopala a Cuir il 1396; el ha renovà en pli il contract d'alleanza da la Lia da la Chadé il 1406, ha cumandà l'emprima conquista da Clavenna il 1407 ed è daventà cont sin la Fürstenburg en il Vnuost il 1411. Il 1459 han ils de Marmels obtegnì il dretg da burgais da Cuir. Nicolaus è stà avat da Mustér dal 1439 al 1448. Tranter il 1461 ed il 1511 han sis members da la famiglia studegià ad universitads europeicas, tranter auter Conradin, decan dal chapel catedral da Cuir a Cuir il 1471–1504, Ulrich, l'emprim Grischun ch'ha predeggià la nova cardientscha (enturn il 1523) a Scharons, e ses frar Georg, reformatur dad Eigias (enturn il 1532). Catharina è stada abadessa da Cazas enturn il 1541.

L'exponent il pli influent da la famiglia è stà Conradin ch'ha acquistà enturn il 1500 il signuradi da Razén ed è vegnì nominà in dals trais chaus feudals da la Lia Grisca. La pussanza dals de Marmels è anc s'augmentada cun l'acquist dal signuradi da Lantsch Sut e l'occupaziun da l'uffizi da burgamester da Cuir tras Rudolf e da la podestataria da Castels tras Hans e Hans Jörg 1523–96. La vita pumpusa sin il chastè da Razén ha mess la famiglia en difficultads finanzialas ch'han sfurzà ella da vender il signuradi (1553). En Lumnezia han Conradin (1511) ed Ulrich (mastral Risch) occupà sis giadas l'uffizi dal mastral tranter il 1532 ed il 1556, e Rudolf è stà activ sco landrehter da la Lia Grisca 1625–26 e 1640–41. En il 16avel tschientaner han ils de Marmels mess trais guvernatur, in cumissari e tschintg podestats en las Terras subditas, en il 17avel tschientaner in vicari (Rudolf). La lingia restada en il Surses (Demarmels) è s'impoverida ed ha alura fatg part dal stan puril. Ils de Marmels èn stads tranter las familias reticas las pli influents dal 15avel e 16avel tschientaner.

Martin Bundi

Lexicon Istoric Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istoria grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



L'hotel Löwe a Mulegns vegniva frequentà da personalitads impurtantas.